

NAQQIUT

Taarserpaa akissuteqaat 20. aprili 2026-meersoq

Meeqqat atuarfiat pillugu nunatta inatsisartuisa inatsisaat nr. 15, 3.december 2012-meersoq allanngortinneqarnissaanik Naalakkersuisut aalajangiiffigisassaattut siunnersuut, ukiup atuarfiusup kalaallit kulturikkut inuiaqatigiinnilu pissutsinut naleqqussarneqarnissaa siunertaralugu.

(Inatsisartunut ilaasortaq Kuno Fencker, Naleraq)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut sinnerlugit qutsavigaara Inatsisartuni ilaasortaq, Kuno Fencker, Naleraq, Inatsisartunut aalajangiiffigisassatut siunnersuutaanut.

Meeqqat atuarfiata kalaallit kulturianut inuiaqatigiinnilu pissutsinut tulluarneqarnerunissaanik siunertaqarneq Naalakkersuisut isumaqatigivaat, aammalu atuartut kalaallit kulturianut, oqaasiinut, pinngortitamut inooriaasaannullu attuumassuteqarnerisa nukittorsarneqarnissaat isumaqatigalugu.

Meeqqat atuarfiat pillugu inatsisip allanngortinneqarnissaanik suliaqarnermi (UPA2026/35-mi), meeqqat atuarfiata kulturikkut tunngaveqarnerup ataqatigiinnerullu nukittorsarneqarnissaanut qanoq peqataanissaa pingaartinneqareerpoq. Allanguuteqartitsineq taanna atuartitsissut ataasiinnaq imaluunnit suliniut ataasiinnaq aqqutigalugu pisinnaanngilaq, kisianni atuartitsissutini atuartitsinermilu kulturip, oqaatsit naleqartitallu annertunerusumik ataatsimoortinneratigut tamanna pisinnaavoq.

Tamatumunnga peqatigitillugu kommuunit inatsisit atuutereersut iluini pinngortitaq, sunngiffimmi inuuneq aamma najukkaminni pissutsit atuartitsinerup pilersaarusiomerani ilanngutissallugit pitsaasunik periarfissaqareernerat erseqqissaatigineqassaaq. Taamatuttaaq ilinniartitsinermi atortut Kalaallit Nunaanni pissutsinik aallaaveqartut ineriartortinneqartarput, atuartitsineq taamaalilluni atuartunut naleqquttutut ilisarnartutullu misigineqartarpoq.

Siunnersuuteqartup ilaatigut ukiup atuarfiusup aallartittarnerata naggaserneqartarneratalu allanngortinneqarnissaat, taamatullu aprilimi maajimilu sapaatip akunnerata ataatsip atuartitsiviusartup naannerulersinneqarnissaanik periarfissiisoqarnissaa siunnersuutigivaa. Tassani Naalakkersuisut naliliipput allannguut taamatut ittoq ullunik atuartitsiviusunik ikinnerulersitsissasoq taamaattumillu ullut atuartitsiviusut atuartunut takinerulissasut, taakkualu ataatsimut isigigaanni ilikkariartornermut atugarissaarnermullu kingunerlutitsisinnaallutik.

Tamatumunnga peqatigitillugu Naalakkersuisut isumaqarput, ukiup atuartitsiviusup pilersaarusiortarneranik apeqqut meeqqat atuarfiata ineriartortinnissaa siunertaralugu sulianut

allanut kattullugu suliniutigineqassasoq. UPA2026/64-imi aamma 143-imi sulianut tunngatillugu ilaatigut klassini atuartut amerlassusii atuartitsinerullu pilersaarusiorneqartarnera ataatsimoortillugu suliniutaasussaareerput.

Taamaattumik Naalakkersuisut kissaatigaat UPA2026/93 sulianut taakkununga ilanngunneqassasoq, taamaaliornikkut ukiup atuarfiusup kalaallit kulturiat inuiaqatigiinnilu pissutsit eqqarsaatigalugit eqaannerusumik aaqqiissuteqarfiginissaata periarfissaanera, suliassat allat tulluurtut suliniutigineqarnerannut ilanngullugu qulaajarneqarsinnaassammat.

Taaneqartut tunngavigalugit Naalakkersuisut allannguutissatut siunnersuut tulluuttoq akuerineqassasoq innersuussutigat:

”Suliat UPA2026/64-ip aamma UPA2026/143-p malitsigisaasa annertusineqarnissaat siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Ukiup atuarfiusup kalaallit kulturiat inuiaqatigiinnilu pissutsit eqqarsaatigalugit eqaannerusumik pilersaarusiorneqarnissaanut periarfissanik suleqatigiit taamaalillutik aamma nalilersuilissapput. Suliaq siunissami inatsisitigut malittarisassatigullu allannguutaasinnaasunut tunngaviliisuusaaq aammalu nalunaarusiami UKA2027-imi saqqummiunneqartussami ilaasinnaassalluni.”